

## ARLeF: la lenghe furlane protagoniste a Friuli Doc

**In program un incuintri su la storie de lenghe furlane e pai plui piçui un laboratori par imparâ a dissegnâ i fumuts. I fantats di YoupaTubo a presentin in esclusive un gnûf video sul frico.**

A son apontaments pensâts par grancj e par piçui, cuntun element in comun: la lenghe furlane e la sô valorizazion. La ARLeF – Agjenzie regjonâl pe lenghe furlane e conferme la sô presince aromai tradizjonâl a Friuli Doc, ancje in ocasion de edizion numar 30.

**LABORATORI CUI GNOGNOSAURS** – Il prin apontament di segnâsi, dedicât ai plui piçui, al è chel di **sabide ai 14 di Setembar. Aes 16.30**, di fat, te Biblioteche Civiche “V. Joppi” di Udin (sezion Moderne) *Maman!* al presentarà “**Impare a dissegnâ i fumuts cui Gnognosaurus**”, un laboratori, pai fruts dai 3 ai 10 agns, tignût dal ilustradôr Dree Venier, autôr dai dinosaurs plui simpatics dal Friûl. Ai piçui, dopo vê passât un dopomisdì in compagnie di colôrs, penarei e tante fantasie, ur vignarà regalât il gnûf fumut “Ciak! Si colore cun GnognoWood”, editât da La Vita Cattolica cul finanziament de ARLeF. **Par notâsi** al laboratori si à di scrivi, **dentri dai 13 di Setembar**, a [info@sportelfurlan.eu](mailto:info@sportelfurlan.eu)

**UNA SPLENDIDA FAVELLA** – Il Friuli Doc firmât ARLeF al larà indenant **domenie ai 15 di Setembar, aes 11.30**, te cort di Palaç Morpurgo, dulà che la Agjenzie e presentarà “**Una splendida favella - L'avventurosa storia della lingua friulana e della sua letteratura**”: sessante minûts par contâ plui di mil agns di storie de lenghe furlane graciis ai intervants di Flavio Santi (docent de Universitât de Insubria) e William Cisilino (diretôr de ARLeF). Santi e Cisilino a tocjaran, cun finece e ironie, i fats che a àn puartât ae nassite dal furlan e al so afermâsi tant che lenghe. Une performance a dôs vôs che e piturarà, ancje midiant di une conte par imagjins, un ritrat inedit de lenghe furlane, tant che struc des culturis che tai secui a son passadis pal Friûl. Ae fin dal incuintri si fasarà une degustazion di vins furlans, in graciis de colaborazion cu la Coldiretti Fvj, che e darà acet al event de ARLeF inte suaze dal so calendari siôr di events. Tra chescj ancje chel che al vierç il program, joibe ai 12, realizât propit in colaborazion cu la Agjenzie.

**FRICO A SBREGHEBALON!** – Simpri **domenie ai 15 di Setembar, ma aes 17.15** te Aree “Io sono Friuli Venezia Giulia” in Zardin Grant, la Agjenzie regjonâl pe lenghe furlane, in colaborazion cun Promoturismo FVG, e presentarà in esclusive il gnûf video di YoupaTubo: “**Frico a Sbreghebalon!**”. Une ocasion speciâl dulà che a saran protagoniscj di persone lis fantatis e i fantats di chel che aromai al è un dai canâi YouTube plui amâts dai furlans. A saran propit lôr a contâ di cheste aventure digjitâl che e cres ogni dì di plui.

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Nicolas Fonzar invezit, che al è il protagonist dal gnûf filmât pe rubriche *Mangjâ e Muri*, al presentarà al public la clip dedicate al re dai plats furlans. Cun di plui, al event al parteciparà ancje Giorgio Milocco, il regjist di YoupaTubo, che al contarà cualchi curiositât sul *backstage*. Un dopomisdì siôr di cjaradis, di divertiment e di mangjâ ben, dulà che al intervignarà ancje Adriano Del Fabro, autôr dal libri "E alore, Frico!", e che si sierarà cu la degustazion dal frico de aziende artesanâl "Fricuz" di Resiute e cui vins autoctons de Cantine Bulfon di Valerian.

**YOUPALTUBO PER TUTTI** – Nol è dut achì: tes zornadis de manifestazion, sul grant schermi di Place Libertât e sarà ancje proietade une selezion dai videos di YoupaTubo, in colaborazion cul Comun di Udin.

Udin, ai 5 di Setembar dal 2024

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<